



**Nuna ataasiusoq – inuiaat ataatsimoortut**

**2013-2017**

**Naalakkersuisooqatigiit isumaqatigiissutaat**

## Siulequt

Siumut, Atassut aamma Partii Inuit Naalakkersuisoqatigiilerniarlutik isumaqatigiipput.

Isumaqatigiissutigaarput ammasumik aqutsineq toqqammavigalugu nunarput naalackersuinikkut aqunneqassasoq, kalaallisut anersaaqarluni nunarsuarmioqataanermillu aallaaveqartumik innuttaasut oqartussaaqataanerat akisussaaqataanerallu qulakkiissallugu, taakkulu pisariaqartitaat aallaavigalugit ingerlatsineq naligiimmillu atugassaqartitsineq sulissutigisallugu.

Nunatta inui tassaapput kikkulluunniit nunatsinni najugaqarumallutik innuttaaqataajumallutillu aalajangersimasut, susassareqatigiinnikkut pilerikkumavavut inuiaat timikkut anersaakkullu nukittuut, sutigut tamatigut naleqqussarsimallutik ataatsimoorfeqartut.

Inuiaqatigiit siunissamut isumalluartut peqatigalugit nutaaliorusussuseqarneq nammineersinnaanerlu qaffassarumavarput, inuiattut naleqartitavut pingaartillugit ineriartortitsilluta.

## Suleqatigiinneq

Suleqatigiinnermi inuiattut ilisimasat misilittakkallu tunaartaralugit tatigeqatigiilluni Inatsisartuni naalakkersuisunilu sulineq ingerlakkumavarput.

Innuttaasut toqqissisimanissaat qitiutillugu kikkullu tamat oqartussaaqataanerat pingaartillugu ammasumik akuutitsineq sunniuteqaqataanerlu qulakkeerumavarput.

## Anguniakkat

- Suliffissaaleqineq akiorneqassaaq sulisinnaasullu piaartumik sulilersinneqarnissaat pingaarnersaassaaq.
- Inuussutissarsiornikkut pitsaasumik periarfissiinikkut aningaasarsiorfissat suliffiillu nutaat pilersinneqassapput.
- Aningaasarsiornikkut akisussaassuseqartumik pilersaarusiorkamillu inuiaqatigiit patajaatsumik aqunneqassapput.
- Inuiaat ilinniagaqassusaat qaffassarneqassaaq aammalu ilinniagaqarusussuseq annertusarneqarluni. Ilinniakkat nunatsinni neqeroorutigineqartartut pitsanngorsarneqartuassapput, taamatullu ilinniakkat nunatsinni tiguneqarsinnaanngitsut pisariitsumik iserfigineqarsinnaasallutik.
- Aatsitassarsiornikkut akitsuusersueriaaseq aqutigalugu nunarput aningaasarsilissaaq.
- Suliniutit angisuut pillugit inatsit iluarsivigineqassaaq, tassuunakkullu periarfissat nutaat piaartumik aallartisarneqarlutik.
- Sanaartugassat sinerissamut tamarmut siammassissumik aggulunneqassapput.
- Aalisakkat tulaanneqartartut kiisalu aalisakkat nutaat tunisassiarineqarsinnaasut atorlualernerisigut nunami suliffissaqartitsineq annertusarneqassaaq.
- Ilinniartut praktikkerfissaat sungiusarfissaallu qulakkeerneqassapput, taamatullu tamakkununnga kollegiani inissanik qulakkeerinntoqassalluni.
- Atuarfitsialak inerisaqqillugu suliniutigineqassaaq.

Inuiaat imminut napatittut, sutigullu tamatigut imminnut pilersortut peqqissullu pilersinnissaat anguniarparput.

Aningaasarsiornikkut periarfissat pioreersut nutaallu toqqammavigineqassapput. Aatsitassarsiornikkut suliffissanik pilersitsisoqassaaq akitsuusersueriaatsikkullu inuiaqatigiit aningaasarsiorinneqassapput.

Suliniutini angisuuni, sanaartornermi aammalu aalisarnermi suliffiit ataavartut pilersinneqassapput.

Aatsitassanik qinngornilinnik attueqqusinnngilluinnarneq atorunnaarsinneqassaaq, tamannali pissaq

peqqissutsimut, avatangiisunut pinngortitamullu navianartorsiortitsinngitsumik.

Nunarput ataatsimut isigalugu ineriartortinneqassaaq. Maannamut nunatta equngasumik ineriartortinneqalersimanera aaqqinniarlugu illoqarfiit mikinerit nunaqarfiillu ineriartortinnissaat immikkut pilersaaruserneqassaaq.

Inuussutissalerinermut inatsisiliorsinnaaneq nakkutilliinerlu kiisalu nunami allamiut pillugit inatsisiliorsinnaaneq nunatta tamakkiisumik oqartussaaffigilissavai.

### ***Oqaatsivut***

Oqaatsitta sutigut tamatigut atugaanerit nukittorsarneqassaaq aammalu ilinniartitsissutigineqarnerini pitsaasumik atugassaqartitsinikkut sulissutigineqassaaq.

Pisariitsumik oqaatsivut ilinniartitsissutigineqassapput, kaammattuinnikkullu atugaanerit annertusarneqassalluni.

### ***Pisortani oqartussaaffiit***

Pisortani oqartussaaffiit nalilersoqqinneqassapput, ingerlatsiviit susassaqarfiillu akimorlugit suleqatiginnerup annertusarnissaa angujumallugu. Kiffartuussinerup pitsaassusaa appartinngikkaluarlugu alaffissornerujussuup annikillissarnissaa anguniarneqassaaq.

Eqqunngitsumik ingerlatsisoqartillugu nalunaartarfimmik pilersitsisoqarnissaa, aammalu susassaqarfinni tamaginni aningaasatigut pissaanermillu peqquserluttoqannginnissaa qulakkeerniarlugu inatsisiliortoqassaaq.

### ***Nunanut allanut tunngasut***

- Nunatta nunanut allanut tunngasuni oqartussaaffeqarnerunissaa anguniarneqassaaq.
- EU-mi OLT-mi aaqqissuussinerit iluanni periarfissat atorluarnissaat misissornerneqassaaq.

### ***Nunami allamiut***

- Nunami allamiut pillugit inatsisiliorsinnaanerup tigusissaa siunertarlugu sulineq aallartissaaq.
- Avataaneersunik sulisunik killilersimaarinninnermi nakkutilliineq sakkortusineqassaaq.

### ***Aningaasaqarneq***

Inuiaqatigiit atugarisaasa oqilisaassiffigineqarnissaat siunertaavoq, tassanilu iliuuserineqarsinnaasut pillugit sukumiisumik nalilersuineq ingerlanneqassaaq.

Inuiaqatigiinni aningaasat kaaviiartinneqartut annertusartuarnissaat anguniarneqassaaq, aammalu nalituunngortitsinermi aningaasat nunatsinni sulisinneqarnissaat qulakkeerniarneqassaaq. Tamakunani Aningaasarsiorneq pillugu siunnersuisoqatigiit atorluarneqassapput.

Pisortani suliffeqarfiit nioqqutissanik nunatsinneersunik atuinerat kiffartuussinerillu nunatsinneersut atorneqarnerat annertusarneqassaaq.

### ***Akilerartarneq***

- Sulinerup akilersinnaanerata pitsanngorsarneqarnissaa nalilersorneqassaaq.
- Ingerlatseqatigiiffinnut akilerarutip appartinneqarsinnaanera misissuiffigineqassaaq.
- Pisortanut akiitsunik akiliisitsiniartarneq aalajangersimasumik ingerlanneqassaaq aqqissuusinerlu nalilersorneqassalluni.
- Suliffeqarfissuit akileraruteqartarnikkut nakkutigineqarnerat annertusarneqassaaq.

### ***Inuussutissarsiorneq***

Nunarput aningaasarsiornikkut patajaatsumik ineriartortinneqassaguni pisariaqarpoq inuussutissarsiornikkut pitsaasumik pisariinnerusumillu sinaakkutissaqartitsinissaq.

- Inuussutissarsiornermi siuarsaanissamut pilersaarusiortoqassaaq.
- Inuussutissarsiornermi kiffartuussinissamut isumaqatigiissutit naleqqussarneqassapput.
- Inuussutissarsiornikkut unammilleqatigiinneq nukittorsarneqassaaq.
- Suliffeqarfinnik aallartitsiniaanermi periarfissat aningaasalersueriaatsillu pisariitsut.
- Nammineq pilersitserususeq annertusarneqassaaq.

### ***Sulisoqarneq***

Inuiaqatigiit peqqissut anguneqassappata inuit suliffeqarnissaat qulakkeertariaqarpoq. Inuit suliffissaarunnermik eqqorneqarsimasut suliffeqanngikkallartut sapinngisamik pilertortumik siunertaqartumik sulilersinniarlugit iliuuseqartarnissaq pisariaqarpoq.

Inuusuttut atuarfimmiit anereersimasut sulilersimannngitsut ilinniagaqarsimannngitsullu pillugit immikut ittumik iliuuseqartoqassaaq.

### ***Niuerneq***

- Nioqqutissat iluanaarutigineqarsinnaanerannut qummut killiliisumik inatsisiliortoqassaaq.
- Nunanut sanilerisanut qanigisanullu niueqatigiinneq annertusarneqartuassaaq.
- Niuerfinni nutaani periarfissat eqqummaariffigilluarnissaat (aalisakkat, puisip amii, imeq il.il.).

### ***Takornariaqarneq***

Takornariaqarnerup ukioq kaajallallugu inuussutissarsiutigisinnaanera aqutissiuunneqassaaq.

### ***Ilinniartitaaneq***

Nunatta naalagaaffinngoriartornera ilutigalugu aatsaat taamak pingaaruteqartigilertigaaq kalaallip nunaminut inuiaqatiminullu sullissinissaa. Avataaneersunik sulisoqartarnerup sapinngisamik annikin-nerpaaffianiitinneqarnissaa Naalakkersuisooqatigiit pingaartippaat. Kalaallit inuusuttut nunaminnik aqutsinissamut piginnaasaqartut nunarsuarmioqataanermik qaammaasaqartut anguneqarnissaat ilinniartitaanermi anguniakkat pingaarnersaraat.

Nunatta isorartunerata inoqarfiillu siammasinnerat kiisalu inukitsunnguunerput pequtigalugu ilinniartitaanikkut nukit atorluarneqarnissaat pisariaqarpoq, taamaammallu alimasissumik ilinniar-titsinermi periarfissat siuarsarneqassapput.

Sanaartornermut, aalisarnermut, inuussutissalerinermut aatsitassarsiornermullu tunngasunik ilinniar-titsineq nalimmassarneqassaaq.

Højskolit efterskolillu ilinniagaqarusussutsimut qaffassaapput atorluarneqartariaqarlutillu, tamannalu qulakkeerneqassaaq pitsaasumik sinaakkusiinikkut.

### ***Ilisimatusarneq***

Nunarput pillugu annertuumik ilisimatusartoqarpoq, ilisimatusarnikkullu pissarsiat nunatta iluani ator-luarneqassapput siaruarterneqarlutillu.

Inuusaatsitsinnut, peqqissutsitsinnut nerisatsinnullu tunngasunik kiisalu imminut toquttarnermut tunngasunik ilisimatusarneq pingaaruteqarpoq siuarsarneqartariaqarlunilu.

Naalagaaffinngoriartorneq ilutigalugu niuernikkut, aningaasarsiornikkut, aatsitassarsiornikkut, aalisar-nikkut pinngortitallu nunatsinni ilisimatusaatigineqarnerata annertusarnissaa aatsaat taamak pisari-aqartigaaq, tamannalu pillugu Kalaallit ilisimatusarnikkut nunani allani aamma periarfissaasa pitsan-

ngorsarnissaat sulissutigineqassaaq.

### ***Piorsarsimassuseq***

Eqqumiitsuliorneq, pinngorartitsineq, nipilersorneq, filmiliorneq, isiginnaartitsisarneq atuakkiorterlu aqqutigalugit piorsarsimassuserput eriagineqassaaq, ineriartortinneqarluni siammarterneqarlunilu.

Kalaallit qangaaniit ilisimasaat kingornussaallu illersorneqassapput.

### ***Atuartitsineq***

Meeqqat atuarfiat nukittorsarlugu sulineq, atuartut, angajoqqaat aamma IMAK peqatigalugit, ingerlateqqinneqassaaq.

Meeqqat atuarfiata, peqqinnissaqarfiup, isumaginnittoqarfiup susassaqarfiillu allat akornanni suleqatigiinneq annertusassaaq atuartut pisariaqartitsisut ikorfartorluarnissaat qulakkeerniarlugu.

Ilinniartitsisut ilinniaqqinnissamut periarfissaat pitsanngorsarneqassapput.

Naqinnernik ilisarsisinnaannginnerup qanoq annertutigisumik ajornartorsiutaanera misissuiffigineqassaaq.

### ***Ilageeqarneq***

Ilageeqarnikkut nukittorsaaneq ilagiit sinniisaat aqqutigalugit taakkulu atugaannik pitsanngorsaanikkut aqqutissiuunneqassaaq. Palasinngorniarneq, ajoqinngorniarneq, pattattunngorniartarnerullu nunnatsinni ilinniarneqarsinnaanerisa annertusarnissaat qulakkeerneqassaaq.

### ***Timersorneq***

Timersornerup tarnikkut timikkullu peqqinnartuunera nukittorsartuarusupparput, tassuuna pinaveersaartitsineq annertoq aamma aalluunneqartarmat.

Timersornikkut neqeroorutaasartut qulakkeerneqassappata timersortarfiit pinngitsoorneqarsinnaanngillat, taamaattumillu aserfallannissaat pinngitsoortittariaqarpoq.

Nunatta avammut nittarsaanneqarnerani timersortartut sinniisitta pingaarnersaraat, taamaattumik nunanut allanut unammiartortartut pitsaasumik atugassaqartinneqarnissaat qulakkeerneqartariaqarpoq.

### ***Tusagassiutit aammalu inuit tamat oqartussaaqataanerat***

Inuit tamat oqartussaaqataanerannut tusagassiorfiit arlaannaannut attuumassuteqanngitsut pingitsoorneqarsinnaanngillat.

Tusagassiorfiit inuiaqatigiinnut sullissisut kiffartuussinissamik isumaqatigiissutit aqqutigalugit suliaqartut illuinnaasiunngitsumik tamatiguussusermillu pisussaaffeqarput, tassani oqaatsitta pingaarnertut atugaanerat ersarissumik piumasaqaatigineqartariaqarpoq.

Naqiteriveqarnermut atuakkiorfeqarnernullu periarfissat sukumiisumik misissuiffigineqassapput.

### ***Isumaginninneq***

- Siusinaartumik sulisinnaajunnaarnersiutisiallit pillugit iluarsartuusseqqittoqassaaq.
- Utoqqalinissamut eqqanaarineq soqutiginarsarneqassaaq.
- Katsorsaasarneq nutaamik aaqqissuunneqassaaq.
- Inersimasut kinguaassiutitigut atonerlunneqarsimasut katsorsarneqartassapput.
- Ineqarnermut tapiissutit nalimmassarneqassapput.

### ***Ilaqutariit***

Naalakkersuisooqatigiit anguniarpaat ilaqutariit toqqissisimasut, tamannalu anguneqassaaq ilaatigut

- Ilaqutariit meerartallit akunnattumik isertitallit isertitakitsullu atugarisaasa qulaajaaffigineqarnerisigut.
- Ilaqutariit pillugit højskolertitsisarnerup ingerlanneqartarnerisigut.
- Angajoqqaanngortussanik siunnersuisarnerup annertusarneqarneratigut.

### ***Meeqqat inuusuttullu***

Naalakkersuisooqatigiit anguniarpaat meeqqat inuusuttullu ammasut, silarsuarmioqataasut ilinniarusussuseqartullu.

Meeqqat inuusuttuaqqallu pillugit immikkut suliniarneq nanginneqassaaq.

### ***Utoqqarnik isumassuineq***

Naalakkersuisooqatigiit anguniarpaat utoqqaat atugarisaasa pitsanngorsaavigineqarnissaat siunerta-



ralugu qulaajaasoqarnissaa.

- Utoqqalinersiuteqartarnermi aqqjissuussineq inerisarneqaqqissaaq kommunit peqatigalugit, aappariinneq apeqqutaatinnagu, kisiannili inuttut naleqassuseq aallaavigalugu.
- Utoqqalinersiat saniatigut isertitaqarsinnaanermut killissarititaasoq nalilersorneqaqqissaaq.
- Utoqqaat pillugit suliaqartunik siunnersorteqarneq eqqunneqassaaq.

### ***Innarluutillit***

Innarluutillit nunatsinni allatuulli innuttaapput pisinnaatitaaffeqarlutillu.

- FN-p aalajangersagai naapertorlugit innarluutillit pisinnaatitaaffii qulakkeerneqassapput.
- Angajoqqaat innarluutilinnik meerallit atugarisaat oqilisaassiffigineqassapput.
- Innarluutillit ilinniarsinnaanermut periarfissaat annertusarneqassapput.
- Ersinngitsumik innarluutillit assigiinngissuteqarput pisariaqartitaallu assigiinngitsuullutik.
- Innarluutillit suliffigisinnaasaannik periarfissat annertusarneqassapput.

### ***Peqqinnissaaq***

Peqqinnissaqarfimmi inuit qiteralugit sullissisoqarnissaa Naalakkersuisooqatigiit pingaartippaat, tamannalu sutigut tamatigut toqqissimasumik kiffartuussinnikkut ersersinneqassaaq.

Peqqinnissaqarfimmut nakorsiarniarlutik sianertut akeqanngitsumik kiffartuunneqassapput.

Inuunerluutit pillugit ajornartorsiuteqartut katsorsarneqartarnerat pisariitsumik aqqiivigineqassaaq.

Suliaritinniarlutik utaqqisut ikilisarnissaat siunertaralugu sulineq ingerlateqqinneqassaaq.

### ***Pitsaaliuineq***

Pitsaaliuineq siammasissumik ingerlanneqassaaq. Pitsaaliuinermi suliniutit sunniuteqartut tapersersorneqassapput.

Imminut toquttarneq akiorniarlugu suliniutit immikkut ittumik eqqumaffigineqassapput, imminortarnerlu pillugu ilisimatuussutsikkut misissuinerit tapersersorneqassallutik.

### ***Aalisarneq***

Nunatta imartaaniit pisuussutit uumassusillit inuuniarnitsinnut, aningaasarsiornitsinnut niuernitsinnullu annertuumik toqqammaviupput, taamaattumik aalisarneq inuussutissarsiutini pingaarner-

saavoq.

- Aalisarneq pillugu inatsit nutarterneqassaaq.
- Pisassaqarnermi akiliuteqartitsisarneq atorunnaarsinneqassaaq.
- Aalisagartassanik nutaanik misissuineq annertusarneqassaaq.
- Imartap aalisarfiusup iluani periarfissat tamakkiisumik atorluarneqassapput.
- Aalisakkeriviit tulaassuiffigineqarsinnaasut patajaallisaaffigineqassapput.
- Tulaassisussaataaneq nalilersoqqinneqassaaq.
- Aalisakkanik tunisassiorfiit unammilleqatigiinnerat tamakkiisumik ammarneqassaaq.

### ***Piniarneq***

Isorliunerusuni qangaaniit piniariaatsimik attassisut killilersuiffigineqarnerat nalilersoqqinneqassaaq.

Pisuussutininik uumasusilinnik pisassanik siunnersuisarnerni atuisut uumasunillu ilisimatuut ilisimasaat atorluarneqassapput.

### ***Nunalerineq***

Naatitanik, neqimik inuussutissanillu imminut pilersornerput annertusarneqassaaq. Nersutit savallu toqorarneqartartut amerlissapput.

Nunaateqarnerup siuarsarnerani Nunalerineq pillugu siunnersuisoqatigiit qanimut suleqatigineqassapput.

Nunalerineq pillugu ataatsimiititaliap innersuussutai ineriartortitsinermi toqqammaviliissapput.

### ***Inuussutissat***

Inuussutissalerinermut inatsisiliorsinnaaneq naalagaaffimmiit tiguneqassaaq.

Kalaaliminernik tunisassioneq niueqatigiinnerlu sulissutigineqassaaq suliniaqatigiiffiit soqutigisaqatigiillu susassaqtartut suleqatigalugit.

### ***Suliniutit angisuut***

Naalakkersuisooqatigiit suliniutit angisuut pillugit inatsisip nalilersoqqinneqarnissaa siunniuppaat:

- Nunatsinni umiarsuarnik assartuinnermi najoqqutassat qulakkeerneqassasoq.
- Nunatsinni sulisartoqarnermi kattuffiit isumaqatigiinniussisarneri qulakkeerneqassasoq.
- Kalaallisut oqaaseqartunut tuluit oqaasiinik atuinissamut piumasaqaateqarneq killiliissan-

ngitsoq.

### **Aatsitassat**

Aatsitassat pillugit Naalakkersuisooqatigiit makku isumaqatigiissutigaa:

- Aatsitassarsiornikkut piiaanissamik pilersaarutit suliniutillu angisuut aallarteriaannaat isumaqatigiissutaareersut malillugit piviusunngortinneqassapput.
- Aatsitassarsiornermi nakkutilliisoqarfimmik pilersitsinissaq.
- Tunisassiornermi akitsuutini akikut malinnaasumik aammalu annertusiartorsinnaasumik pilersitsineq akileraartarnermi inatsisit atuuttut aqutugalugit.
- Inatsisartuni Aatsitassarsiornermut ataatsimiititaliamik pilersisoqassaaq qinikkat akornanni nakkutilliisussamik.
- Suliffeqarfissuit pilersaarutaasa tamakkiisumik paasisaqarfiginissaat ammasumillu ingerlatsineq.
- Tusarniaanermi atortut tamarmik oqaatsit pillugit inatsit malinneqartassaaq.
- Uuliasiorlut isumannaallisaanermut avatangiisitigut maleruagassaat kiisalu upalungaarsimanermut pilersaarutaat tamanut ammasuussapput.
- Aatsitassanut aqutsisoqarfik pisortaqaarfinngortinneqassaaq.
- Uuliasiornermi misissuinermi piiaanissamullu akuersissutit atuutiinnassapput, nutaanilli tunniussisoqarnissaa tunuarsimaarfigineqarpoq.

### **Sanaartorneq illuliornerlu**

Nunarput ataatsimut isigalugu sanaartornermi pilersaarutit ingerlanneqassapput.

- Illoqarfiit nunaqarfiillu mikinerusut ineriartortinnissaannut pilersaarusiortoqassaaq.
- Nammineq illulianik sanaartornerup isorliunerusunut nunaqarfinnullu annertusarneqassaaq.
- Sanaartornermi nakkutillineq sukannernerusumik ingerlanneqassaaq.
- Angerlarsimaffeqanngitsut najugaqarfiannik Nuummi sanaartortoqassaaq.

### **Inissiat**

Illusinermi inissiamilluunniit pisinermi akiliutit erniaannik akileraarutitigut tamakkiisumik ilanngaateqartoqartassaaq.

Inissiat oqummik eqqugaasimasut pillugit qulaajaaneq nanginneqassaaq.

Attartortumiit piginnittuunermut aaqqissuussineq pilerinarsaqqinneqassaaq.

### **Attaveqaateqarneq**

Nunatta isorartunera innuttaasullu siamasissumik najugaqariaaseqarnerat peqqutaalluni attaveqarnerup aqqissugaanera nunatta ataatsimoorneranut pingaaruteqarluinnarpoq.

Attaveqaateqarnikkut akitigut atuisunut pitsanngorsaajuarneq pisariaqarpoq. Internetikkut atugassarititaasut nalimmassarneqassapput.

Paasissutissat ilisimasallu tungaatigut aallersinnaaneq annertusarniarlugu ilinniarfiit, atuarfiit kollegiallu akikinnerpaamik internetimut atuisinnaangortinneqassapput.

Aalisartut savaatillillu attaveqaateqarnikkut sullinneqarnerat pitsanngorsaavigineqassaaq.

### ***Nukissiorneq***

Ikummatissamik avataaniit isumalluuteqaneq ingalassimatinniarlugu nukimmik mingutsitsinngitsumik tunisassiornerput qaffassassavarput.

Nukissiuutit allat mingutsitsinngitsut atornerarnerat siuarsassaaq.

Nukissiorfiit aktiaateqarluni ingerlatseqatigiiffinngortinneqassaaq.

### ***Angallanneq assartuinerlu***

Nunap immikkoortuisa ilaanni angallannikkut unammilleqatigiinnissamut periarfissaqarnera misissuisoqassaaq.

Kiffartuussinnermut isumaqatigiissutini angallannermut periarfissat allat atornerarsinnaanersut nalilersorneqassaaq.

Assartuussineq pillugu isumalioqatigiissitap innersuussutai nalilersorneqassapput pingaarnersiuisoqarlunilu.

Utoqqalinersialinnut angallannermi akitigut akikillisaasinnaaneq misissuiffigineqassaaq.

### ***Sillimaniarneq***

Silaannaap kissakkiartornera ilutigalugu nunatta imartaani angallannerup annertusiartornerani imartap ittissusaanik nalunaarsuisoqartariaqarpoq.

Umiarsuit issittup imartaanut naapertuuttumik sannaqarnissaat qulakkeerneqartariaqarpoq.

SAR pillugu nunanut sanilerisatsinnut annertunerusumik suleqatigiittoqassaaq.

### ***Inatsisinik atortitsineq***

Eqqartuussiveqarneq pillugu isumalioqatigiisitap innersuussutaasa timitalernissaat siunertaralugu sulineq ingerlaqqissaaq:

- Pinerluuteqarsimasut katsorsartinneqarnissamut periarfissaqassapput.
- Inuusuttuaqqat 18-iliisimangitsut pinerluuteqarsimasunut isertitsiveqalernissaq sulissutigineqassaaq.
- Pineqaatissinneqarsimasut isertitsivinnut utaqqisinneqartarnerat sivikillisinniarneqassaaq.
- Pineqaatissiisarnermi inuiaqatigiinnut kiffartuussinissamut periarfissat atorluarneqassapput.

### ***Kommunit***

Kommunerujussuarnut ikaarsaarnermi innuttaasut kiffartuunneqarnerisa naligiissaarneqarnissaat oqartussaaqataanerisalu pitsanngorsarneqarnissaat siunertaavoq, taamatullu ingerlatsinermi pisariil-lisaasoqarnissaa.

Kommunerujussuarnut ikaarsaarnerup siunertamut naapertuunnersoq nalilersorneqassaaq.

Kommunit iluanni sumiiffiit siunnersuisoqatigeeqarnerat qulakkeerneqassaaq.

### ***Avatangiisit pinngortitarlu***

Aatsitassarsiornermik inuussutissarsiutinut ikaarsaaraluttuarnermi avatangiisit pinngortitarlu eqqum-maariffigalugit illersorneqassapput.

### ***Nunasiaataasimanerup kingunerisimasai pillugit***

Nunatta nunasiaataasimanagera qaangerniarlugu saammassinissaq isumakkeerininnissarlu pisaria-qarpoq, tamannalu pillugu qanoq iliuusissamik pilersaarusiortoqassaaq.

Naalakkersuisooqatigiit isumaqatigiissutaat atsioqatigiinnikkut atuutilissaaq.

Nuuk, ulloq 26. marts 2013



Aleqa Hammond  
Siumut



Gerhardt Petersen  
Atassut



Nikku Olsen  
Partii Inuit